

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines:-

1. प्रधानमंत्री नरेंद्र मोदी होर अज्ज मुम्बई च दऊं युद्धपोतें ते इक पनडुब्बी गी भारती नौसेना दे बेड़े च शामिल करडन।
2. उपराज्यपाल मनोज सिन्हा होरें आखेआ ऐ जे कुसै शहीद दा घर इक मंदर आहला लेखा पवितर होंदा ऐ ते भावना ते सम्मान हर देशवासी दे मनै च शहीदें लेई होना लोड़चदा।
3. राजौरी जिले च कुसै अंजान बमारी कारण 2 होर मोतां, अजे तोड़ी 14एं जनें दी मौत होई चुकी दी ऐ, मुख सचिव होरें जांच कम्में च पुलिस ते सेहत मैहकमे गी आपूं च तालमेल बनाइयै कम्म करने लेई आखेआ ऐ।
4. जंगलात मंत्री जावेद अहमद राणा होरें अखनूर दा दौरा कीता, विकास परियोजनाएं दा जायजा लैता ते कम्में गी तौले तोड़ चाढ़ने दा निर्देश जारी कीता।
5. महाकुम्भ 2025 लेई कटड़ा ते प्रयागराज बश्कार विशेष रेल गड्डी दी बवस्था।

<><><><><><>

PM-Navy

प्रधानमंत्री नरेंद्र मोदी होर अज्ज मुम्बई च 2 युद्ध पोतें ते इक पनडुब्बी गी भारती नौसेना दे बेड़े च शामिल करने दे समारोह च हिस्सा लैडन। इनें युद्धपोतें च आई.एन..एस-सूरत ते आई.एन.एस नीलगीरी शामिल न जिसले जे पनडुब्बी दा नां आईएनएस वाघशीर ऐ। एह पैहली बार ऐ जे त्रै पोत किट्टे नौसेना दे बेड़े च शामिल कीते जा करदे न। एह रक्षा दे खेतर च भारतीय विनिर्माण ते समुंद्री सुरक्षा च कुल संसारी सतह दा नेतृत्व हासल करने दे भारत दे लक्ष्य आहली भेठा इक महत्वपूर्ण गैह ऐ। इस कार्यक्रम दे बाद प्रधानमंत्री होरें नवी मुम्बई दे खारघर च श्रीराधा मदनमोहन जी मंदर दा उद्घाटन करंगन जेदा निर्माण इसकॉन परियोजना तैहत 9 एकड दे इलाके च कीता गेदा ऐ। इस मंदर परिसर च इक वैदिक शिक्षा केंद्र, इक अजैबघर, आडीटोरियम ते आरोग्य केंद्र बनाना बी प्रस्ताव च ऐ।

<><><><><><>

LG-Veterans Day

उपराज्यपाल मनोज सिन्हा होरें आखेआ ऐ जे कुसै शहीद दा घर इक मंदर आहला लेखा पवितर थाहर होंदा ऐ ते एह भावना ते सम्मान हर खास-ओ-ओम दे मनै च शहीदें लेई होना लोड़चदा। कल अखनूर च थेआरबंद बलें दे वरिष्ठ सैनिकें दे सम्मान च लोआए गेदे इक समारोह दौरान बोलदे होई उनें एह गल्ल आक्खी। इस समारोह दी प्रधानता रक्षा मंत्री राजनाथ सिंह होरें कीती जिस दौरान थेआरबंद बलें दे योगदान ते कुबागिनं गी चेता कीता गेआ। मनोज सिन्हा होरें आखेआ जे एह समाज दी जिम्मेवारी बनदी ऐ जे ओह थेआरबंद बलें दे सैनिकें, वरिष्ठ साबका फौजिएं ते उन्दे परिवारें दी भलाई-बेहतरी गी यकीनी बना। किट्टै गी संबोधित करदे होई मनोज सिन्हा होरें आखेआ।

जियां जे पैहले बी खबर दिती जाई चुकी दी ऐ जे इस मौके कल अखनूर च 108 फुट उच्चा राष्ट्रीय झंडा चाढ़ेआ गेआ ते अखनूर विरासती अजैबघर दा बी उद्घाटन कीता गेआ। समारोह दौरान लोइमंद साबका फौजिएं ते वीर नारिएं गी बैटरी कन्नै चलने आहलियां व्हील चेरयां, स्कूटियां ते ट्राइसाइकल बी दिते गे।

<><><><><><>

Veteran Day JK

थेआर बंद बलें दे वरिष्ठ सदस्यें दे सम्मान च 9मां आम्ड फोसिस वेटरन्ज ध्याड़ा समूलचे जम्मू-कश्मीर च बी शैल जोश, जज्बे कन्नै मनाया गेआ। इस सिलसिले च आयोजित कार्यक्रमें दौरान थेआरबंद बलें दे महत्व, योगदान ते उन्दी कुर्बानिएं गी चेता कीता गेआ। इस मौके थेआरबंद बलें दे सदस्य, उन्दे परिवार, शहीदें दियां वीर नारियां ते होर लोक बी मजूद रेह। इस ध्याड़े गी मनाने दा सिलसिला 2016 च शुरू कीता गेआ हा जेदा मकसद थेआरबंद बलें दे साबका सदस्यें प्रति समाज च सम्मान ते मानै आहली भावना गी विकसित करना ऐ। एह ध्याड़ा साबका फौजिएं प्रति सम्मान दे कन्नोकन्नी भारत दे पैहले सेना प्रमुख फील्ड मार्शल के. एम करिअप्पा हुंदे पिन्शनी होने दा बी ध्याड़ा ऐ। अजे की ओह 1953 च रटैर होए हे, पर फील्ड मार्शल दा रैंक उनेंगी 1986 च थोआ हा। रामबन जिले दे मैत्रा इलाके च आयोजित इक कार्यक्रम दौरान बी खरी मती गिनतरी च लोकें थेआरबंद बलें दे वरिष्ठ सदस्यें प्रति सम्मान प्रगट करदे होई उन्दे योगदान पर लो पाई। इस दौरान स्हाड़े जिला संवाददाता अजयदीप सिंह कन्नै गल्ल करदे होई मेजर जनरल ए.पी.एस बाल होरें आखेआ।

<><><><><><>

Badhal Deaths-CS

राजौरी जिले दे बडाल गांस च इक अंजान बमारी कन्नै पिछले 24एं घैंटे च दो होर लोकें दी मौत होई गई ऐ ते दिसंबर म्हीने थमां इस बमारी कन्नै मरने आहलें दी गिनतरी 14 होई गई ऐ। जंदे रोज जिंदी मौत होई उन्दे च 6 बरे दी कुड़ी सफीना कौसर ही जिसदी मौत जम्मू दे एस.एम.जी.एस अस्पताल च ते ओहदे गै रिश्तेदार मोहम्मद युसुफ दी मौत जीएमसी राजौरी च होई ऐ। चीफ सैक्रेटरी अटल डुल्लू होरें सेहत माहिरें ते राष्ट्रीय संस्थान दे अधिकारियें कन्नै मौतें दी जांच करने आस्तै इक बैठक लाई। अटल डुल्लू होरें सेहत ते पुलस मैहकमें गी आखेआ ऐ जे ओह इस अंजान बमारी दा पता लाने आस्तै तालमेल बनाइयै कम्म करन। बैठक दौरान दस्सेआ गेआ जे PGIMER, NIV ते NCDC दे माहिरें गी कोई बी कसंक्रमण नेई लब्धा पर पीड़ितें दे नमूने च .. यानि नसैं तंत्रिकाएं च विकार दी पंछान कीती गई ऐ। फ्ही बी इस बमारी कन्नै होने आहली मौतें दा पता लाने लेई जांच अजे जारी ऐ।

<><><><><><>

JJM-Review

जम्मू-कश्मीर च जल जीवन मिशन दे निदेशक खुर्शीद अहमद शाह होरें कल राजौरी जिले च जल जीवन मिशन तैहत चला रदे कम्मै दा जायजा लैता। वर्चुअल ढंग्गै सिर लग्गी दी बैठक च मिशन डायरेक्टर होरें चला'रदे सारे कम्में गी समेंसिर पूरा करने लेई आखेआ तां जे हर घर जल तैहत 100 फीसद लक्ष्य गी हासिल कीता जा। उनें मुतलका अधिकारिएं गी आखेआ जे ओह थाहरें दे टकोहदे मामलें गी हल करन ते कम्मै दी रफ्तार गी तेज करन तां जे समें-सीमा अंदर कम्म सबूरा होई सकै। उनें कम्में लेई मशीनरी हासल करने, सम्प टैंक बनाने, पम्प रूम, पानी साफ करने लेई रैपिड सैंड फिल्ट्रेशन प्लांट ते पैपां बछाने दे कन्नै बल बी टकोहदा ध्यान देने पर जोर दिता तां जे कुदरै बी कोई कमी पेशी नेही रेई जा।

<><><><><><>

ते हुन बाकि दिए खबरें कन्नै शगुफ्ता चौधरी।

Javed Rana Akhnoor Visit

जल शक्ति, जंगलात ते पर्यावरण सरबन्धी मंत्री जावेद राणा होरें अफसरें गी हिदायत दिती ऐ जे ओह जल जीवन मिशन तैहत पानी दी सप्लाई योजनाएं गी पूरा करने च तेजी आहनन ते अखनूर च सिंचाई ते हाई गी काबू करने सरबन्धी परियोजनाएं पर तेजिया कन्नै कम्म करन। अपने दौरे दौरान मंत्री होरें ग्रामीण घरें गी नलके दा पानी उपलब्ध करोआने ते राईबाई आस्तै सिंचाई च सुधार आहनने आहली परियोजनाएं गी समेंसिर मुकम्मल करने दे निर्देश जारी कीते। उनें कालीधार रेंज च मिट्टी दी संरक्षण ते जंगलातें दे कम्मकाज पर बी ध्यान देने पर जोर भरेआ। मकामी लोकें मंत्री हुंदे कन्नै पेश आवा रदे मुद्दें बारें चर्चा कीती जिंदे च हेंडपंप जनेह् मुद्दे शामिल हे। मंत्री होरें फौरी कार्रवाई करदे होई भरोसा दोआया जे लोकें आसेआ पुट्टे गेदे मुद्दें गी तौले गै पूरा कीता जाग।

<><><><><><>

Mahakumbh

महाकुम्भ 2025 दे सिलसिले च श्रद्धालुएं दी सुविधा लेई उत्तरी रेलवे नै श्री माता वैष्णो देवी कटड़ा ते प्रयागराज बश्कार विशेष रेल गड्डी चलाने दी घोषणा कीती ऐ। पैहली रेल गड्डी श्री माता वैष्णो देवी कटड़ा थवां 24 जनवरी गी चलोग। अगलियां दो रेल गड्डियां 7 फरवरी ते 14 फरवरी गी चलडन। इनें विशेष रेल गड्डिएं दा मकसद लोकें गी सुचारू ढंगै सिर प्रयागराज पजाना ऐ। इस पैहल दा मकसद महाकुम्भ च हिस्सा बनने दी इच्छेआ रखने आहलें गी स्थूलत प्रदान करना ऐ ते रेलवे दा आखना ऐ जे ओहदे लक्ष्य सदा गै अपने यात्रिएं दी सुविधा दा ख्याल रखना ऐ।

<><><><><><>

Ganga-Aarti

मकर संक्रांति दे मौके पर कल जम्मू दे ऐतिहासिक श्री रघुनाथ जी चौक च गंगा आरती आंगर दा इक विशेष आयोजन कीता गेआ। इस शानदार कार्यक्रम गी दिक्खने लेई कई मकामी ते बाहरा आए दे श्रद्धालु बी मजूद हे जेदे चलदे पूरे रघुनाथ बजार दा माहौल भक्तिमय होई गेदा हा। विधायक युद्धवीर सेठी ते सैलसफा निदेशक विकास गुप्ता होर बी कार्यक्रम च शामिल होए। स्हाड़े जिला संवाददाता अंकुश शर्मा कन्नै गल्ल करदे होई युद्धवीर सेठी होरें आखेआ।

<><><><><><>

Driving Test Kot Bhalwal

जम्मू दे कोट भलवाल च गड्डी चलाने आहले ड्राइविंग ते सिखलाई इंस्टीच्यूट नै आधिकारिक तौर पर 14 जनवरी थमां ड्राइविंग टैस्टें दे परीक्षण शुरू करी दिते न। पैहले एह ड्राइविंग टैस्ट नगरोटा दे खानपुर च लैते जंदे हे। कोट भलवाल च ड्राइविंग टैस्ट लैने आस्तै 6 विशेष ट्रैक डिजाइन कीते गेदे न। स्हाड़े आकाशवाणी दे संवाददाता अंकुश शर्मा कन्नै गल्लबात करदे होई ट्रांसपोर्ट कमिशनर विशेष महाजन होरें आखेआ।

<><><><><><>